



Infuormaziuns

gün 2020

Stimats genituors

L'on da scoula curraint va fingià vers la fin. Quist on da scoula restarà in algordanza a tuots, probabelmaing pel rest da la vita. Il coronavirus ha miss suotsura tuot il muond. Eir scha la situaziun s'ha quietada e differentas masüras han pudü gnir schlockiadas o sun gnüdas scholtas cumplettaing nun es il virus amo adüna na eliminà. Nus sperain però ch'el nu'ns fetscha plü tant fastidis sco fin uossa e cha la vita possa as normalisar cun ir dal temp dal tuottafat. I vala inavant esser precaut, tour in tschertas occasiuns üna distanza sana ed impustüt lessa giavüschar amo adüna a tuots buna sandà.

Pella scoula esa stat ün on turbulent e la culmaina es sgüra stat il temp cull'instrucziun a distanza. Pella buna reuschida da tuot quist temp faja dabsögn quia d'ün ulteriur ingraziamaint a tuot las scolaras e tuot ils scholars, a las persunas d'instrucziun, als genituors, als partenaris da la scoula da Scuol sco per exaimpel il CSEB ed a tuot las instanzas chi han tenor mai agi tenor meglder savair e pudair. Tuots han dovrà blera pazienza, han stuvü renunziar a differentas occurrenzas ed han stuvü agir da maniera flexibla.

Displaschaivelmaing nu pudaina però listess na finir l'on da scoula sco previs e perquai laina quia comunicar - spranza pell'ultima jada quist on da scoula - davart situaziuns specialas in scoula. Implü daina jent inavant amo alch infuormaziuns organisatoricas chi pertoccan il nouv on da scoula. Nus giavüschain a tuot ils uffants amo üna buna finischun da l'on da scoula ed impustüt a tuot quellas scolaras e quels scholars chi bandunan in duos eivnas la scoula populara da Scuol tuot il bun in lur avegnir, saja quai d'ürant il temp da giarsunadi, illa scoula cuntinuanta o eir i'l cumün chi cuntinuan la scoula obligatorica in avegnir.

Exposiziun da las lavurs da zambriar e zambriar textil e material restà inavo d'ürant l'on da scoula

Displaschaivelmaing tocca eir l'exposiziun pro ün dals arrandschamaints chi nun es pussibel da realisar illa fuorma üsitada cun resguardar las reglas actualas da l'Uffizi federal da sandà (BAG). Sülla pagina d'internet illa part da Scuol publicaina üna seria da fotografias da differentas lavurs gnüdas realisadas d'ürant l'on da scoula.

Probabelmaing eir causa il temp da preschentscha plü cuort in chasa da scoula, es il mantun da büschmainta restada inavo quist on bler plü pitschen. Sch'inchün mancainta alch büschmainta o less dar ün cuc in quel mantun per verer scha l'uffant ha invlidà alch, giavüschaina da tour sü contact cul secretariat e lura pudaina muossar quai chi'd es restà inavo. La büschmainta nu po gnir exposta quist on publicamaing.

Musical scoulina e 3. e 4. classa

Il musical da las scoulinas da Scuol e Sent ha displaschaivelmaing stuvü gnir annullà pervi dal coronavirus. La 3. e 4. classa han realisà ün musical chi po gnir preschantà tenor novas directives dal coronavirus a las famiglias da las scolaras e dals scholars pertocs. Infuormaziuns detagliadas survegnan Els directamaing da la magistra e dal magister da las duos classas.

Conclusiun da l'on da scoula

L'arrandschamaint da finischun da l'on da scoula sco chi til as cugnuscha dals ultims ons nun ha lö pervi dal coronavirus. Üna conclusiun ün pa speciala ed adattada a la situaziun ha lö culs giuvenils da 9avla chi han in venderdi, 26 gün 2020 lur ultim di da scoula. L'arrandschamaint nun es public, las famiglias da las scolaras e'ls scolars da 9avla survegnan las infuormaziuns bsögnaivlas da Lur uffant. Co chi guarda oura l'ultim di pellas scolaras e pels scolars da prüma fin otavla classa vegnan Els infuormats directamaing da las magistras e dals magisters da classa.

Uraris da scoula 2020/21

Ils uraris da scoula per l'on da scoula 2020/21 sun prunts e sancziunats dal cussagl da scoula. Subit chi sun acceptats eir amo da l'inspectorat da scoula tils surdaina inavant eir a tuot ils genituors. Quai stess capitar d'ürant ils prossems dis. Sch'inchün vess jent infuormaziuns davart ils uraris fingià uossa po'l contactar directamaing a la magistra o al magister da classa. Quel po lura surdar ils uraris culla resalva chi gnian amo sancziunats in quista fuorma da l'inspectorat. Singuls pitschens müdamaints interns sun pussibels amo in avuost, schi vess da gnir pro novs scolars e's stu vess far adattamaints pervi da l'integraziun da lingua o da la promoziun integrada. Quels nu pertocan però cumanzamaint o finischun dal di da scoula o davomezdis sainza instrucziun.


Mutaziuns i'l team da magistras e scumpart da las classas

L'on chi vain daja differentas mutaziuns i'l team da magistras e magisters. Davart quists vegnan Els infuormats illa prosma „Gazetta da scoula“. Davart il scumpart da las classas da l'on chi vain Tils ha infuormà fingià üna circulara plü bod.

Occurrenzas 2020/21

Il plan cullas occurrenzas cuntschaintas dal prossem on da scoula as chatta a temp ütil sülla pagina d'internet da la scoula da Scuol (www.scoula-scuol.ch → Scuol → program da l'on). Quist chalender d'occurrenzas vain müdà ed actualisà adüna darcheu. Nus sperain cha'l coronavirus pussibiltescha ün cumanzamaint da scoula plü regular pussibel.

Amiaivels salüds



Mario Rauch, manader da scoula



Bemerkung: Die allgemeine Korrespondenz der Gemeindeschule Scuol wird nur in der offiziellen Gemeindesprache verfasst, d. h. auf Romanisch. Das Schulsekretariat steht aber gerne zur Verfügung, um Eltern anderer Sprachen, genauere Auskünfte zu geben. Die offiziellen Öffnungszeiten des Schulsekretariats sind in der „Gazetta da scoula“ publiziert.

Nota: A correspondência que a escola manda a todos os pais é escrita com a língua oficial da cumuna, ou seja o rumantsch. O secretariado da escola está á disposição das encarregados de educação em caso de duvidas. O horario do secretariado está publicado en „Gazetta da scoula“.